

禮
魚
醫
書

上海
伯
永
頌
堂
印
行

痘疹傳心錄卷之六

松江李林菴啟賢氏重校

西吳朱惠明 著

報點口訣

凡痘之初發也發熱可決輕重肖形可占順逆是以痘瘡見點便視形色細密榮枯
依分善惡色澤神安點如珠粟神枯色黯瘡出乾焦點報粗肥稀疎可必標舒頤屑

細密也

繁密非常帶熱數瘡陸續出齊雖甚密猶為可治一齊湧出掀紅平塌縱稀疎

未退生長細細白頭如癩瘡乾枯必作內攻形啾啾紅點似丹朱焦萎定成憔悴勢

粗肥饜頂點子不紅終白陷頭尖脚斂桃紅光潤定為祥蚊迹蚤斑刻日而登鬼錄

堆沙攢簇引日而返泉鄉肌白嫩則皮薄嬌紅體黃瘦則痘多褐色人黑皮粗痘色

必然慘黯宜辨肌色不同未可一例而識只要尖綻有神不喜嬌紅平塌未熟先敷

數點

或一點 俗名報痘

又名屬痘 無何復熱舒瘡吉凶未審先發塊而後發瘡塊名風毒而

急者先發瘡而後發塊塊名鬼腫以難醫痘始報於太陽頤頰唇肋者多凶瘡初生

于兩耳舌喉胸背者不吉故曰順不憎多逆嫌一點黑疔先見諸瘡誰敢彰形賊痘

諸痘未起張問

若生諸痘不堪貫汁辨認若真急宜挑別是以裏症未平

吐利便閉煩躁悶亂

睡臥不安

痘雖出而毒猶在內透肌發散解毒為先便調神靜

二便清調

身雖熱而毒已

出外補兼升發安表相兼設使內外症平斯又不須過治矣

一凡雜痘初出形色似乎正痘當辨及之
一為風熱發為瘡疹形色初見亦似乎正痘

痘始

且夫痘之為毒也稟於有生之初藏於臟腑天一所生之臟腑也之內隱顯莫測聲臭不聞隨感而見猶鏡之取火鏡中之火雖在使無日之晶光相射何能發也先哲曰痘藏伏處藥鏡相似火未至也寂然無聲火既及也赫然震烈矧痘毒之猛烈非可言喻及其呈見利害妍媸有難悉舉殆非刻舟求劍者所可語也

一凡痘初見點於正面吉部相去二三寸一顆尖細淡淡桃紅色者必稀而轉也若初見點於正面凶部二三相並或五六成叢或赤或白頂平而少神者必密而重也一經曰病有輕重藥有淺深故痘之初出有輕而有重也稀者輕而密者重交痲疹而出者半輕半重如發熱一日報點者太重二日報點者重微微發熱三日報點者為輕四日身涼報點為尤輕自報點三四日方齊磊落如珠大小不一等尖圓緊實顆粒分明淡紅漸加明亮根窠紅活頭面稀少心胸無人事安寧飲食如常二便清調順也痘初報點雖易粗肥形似饅頭或一熱雖齊出而勻朗紅澤雖稠密而陸續出來能食便調此險之可治也一熱齊湧出顆粒不分粘聚成叢頂若火刺乾紅反白色不光澤頭面頸項胸背舌喉稠密無縫嘔吐噎瀉腹痛腰疼喘急腹脹煩燥悶

亂失血者此逆之不可治也

一或悶發熱痘便一齊出者或發熱數日而陸續出者何曰一熱齊出者乃表虛也肺主皮毛脾主肌肉脾肺氣虛則腠理不密肌肉不實不能約束於外則毒火冲擊而出太驟也譬君失其正則寇盜蜂起若熱久而陸續出者乃正氣充足肌膚厚肉分堅則毒受制歸附故陸續而漸出也譬君正則四夷皆化而為善也故曰表虛者易出而難靨表寔者難出而易靨也

一凡痘初見點以火照之簇簇于皮中不見不起者若非風寒壅遏必氣虛不振風寒宜散之氣虛宜補益而兼升發為主也

一凡痘疹出不快者症必有因當詳審而調之○一素壯實之人皮膚厚肉腠密毒氣難以發越宜勻氣為主經曰氣勻則出快○一素虛弱之人先曾瀉利而元氣不足不能拘血運毒而出者宜溫補而兼升發為主經曰正氣足而痘自生化也○一天時嚴寒運氣又在寒水司天毒氣為寒氣鬱遏而不能快出者宜辛熱之劑發之經曰毒得熱則行得寒則凝正此謂也○一炎暑亢極運氣又在君相司天煩渴昏瞶此為兩火相擊而陰水乾涸經曰少水不能滅盛火而陽獨治獨治者不能生長也宜清暑益氣為主○一客受風寒發散之劑表之得汗而痘自出也○一內傷飲食胃氣不行氣血凝注而毒不能快出者宜濁陰之劑利之○一稟賦腎水不足毒

火彌熾水不能制反為所勝毒邪留連於裡而不快出此為獨陽不生也宜滋水以制陽光

一或問經曰痘出身涼微熱為上吉熱微而痘出反密熱甚而痘出反疎者何也曰熱微而痘出密者必其兒口燥渴唇焦裂表雖不大熱而裏熱甚也熱甚而痘出疎者必其兒口不渴唇舌滋潤能食便調身雖大熱而裡氣和平也豈可以熱之輕重論哉

一或問痘必假天行時氣鼓擊而出有出而亦有不出者何也曰夫痘毒中於有生之始畜無形臭及有外邪觸之則忽焉盡發若不感動其邪縱時行發痘而不出也一報點紫色或黑滯而腰背痛者不治方見前腰痛門

一凡報點青色如筋頭大不起凸此冷疔凶也紅斑如錦紋者偏身如蛇皮者如疹如瘡者逆候也

一痘報點而口中腥臭者乃毒乘肺胃煎熬潰爛內潰之症也故臭也宜清金解毒湯或

甘桔湯加連翹蟬蛻芍藥治之隨應藥者醫之功也若失聲喘急噦噎者凶也

附治驗

一兒痘初出便身作痒爬搔不寧余謂風寒外乘滯於皮膚而作痒也搔之者運動以散之也以升麻葛根湯服之又用荆芥穗焙熟以紙包之運其痒處應手而愈

一兒痘出隱隱不見喘咳寒熱交作以升發藥不應召余視之曰時天大寒毒氣為寒氣所抑腠理封閉氣血凝泣而然也當用辛熱之藥佐之治以桂枝葛根湯得微汗而前症悉平痘豁然透出調理愈

一兒痘已見形噦吐不止面色槁枯口唇焦黑余謂胃氣脫絕毒伏於內不能盡出三日而死

一兒痘不易出吐瀉不已醫咸謂毒氣上行則吐下行則瀉擬升發之劑使痘盡透吐瀉自止治之愈甚名余視之熱微安靜痘勻朗嬌紅曰此脾胃氣虛治宜溫補而兼升發或曰痘未盡出而溫補豈不黨邪為禍乎曰醫無定法合宜而用以透肌散又六君子湯加蟬蛻升麻桂枝陳倉朮生姜大棗治之愈○又一兒痘症如前咸以升發而不固真元致伏陷不治

一兒痘隱隱不出面白神疲熱微澀泄余謂脾胃氣虛不能送毒以小異功散加升麻川芎蟬蛻木通陳倉朮服之瀉止痘出又補中益氣湯調理愈

一兒痘出勻朗形綻凸而色淡紅兩腿痛甚叫號不已召余視之曰身半已上俱屬陽分身半已下俱屬陰分腿亦屬陰腎所主也陽虛陰弱則痘毒乘虛凝滯於腿而作痛耳以活命飲治之二劑痛稍止繼以十全大補湯加附子間服八味地黃丸調理而愈○又一兒痘症類前不以早治痛傷元氣色漸微白而唇白面青四肢厥冷

痘變紫黑而六日死○一張氏子五歲痘出隱隱腿痛不息余謂稟賦腎家精氣不足逆也痘不能盡出喘脹狂亂痘變紫黑五日而亡○凡病之始神氣尚存可以藥制之若其始謀不豫宜然罔知生氣已去化工難續雖聖人豈能改天命也哉故曰履端於始序則不愆此之謂也

一兒七歲痘初報點于上唇右及右太陽身肢稠密正額平塌少神顴頰不現四肢厥冷人事昏瞶喘急腹飽便秘余謂風寒壅遏毒火彌熾于內氣血不能運行於經絡故肢冷痘不易透者此寒包熱之症治宜疏散表邪為主用升麻葛根湯加川芎蟬蛻山查山甲等服之又加味獨聖散桑螵蛻蟲攻之六朝正面俱起七朝空處補出贈痘諸症悉平調理而愈

一兒初發熱頸項間紅腫如桃痘雖標形而櫻作膿痘伏陷而卒○又一兒痘二日耳前紅腫如桃余謂癩毒也以葛根湯加荆防牛蒡甘桔治之外以圍藥塗之腫退痘起而愈亦有不應藥者毒起痘陷而死

一兒痘初報點驚搐不止余謂心血不足邪因而客之以歸地赤芍川芎茯神遠志酸棗仁蟬蛻少加石菖蒲治之搐止愈

一兒痘初報點驚搐不止眾曰驚痘多吉或言邪從搐散無害余謂曰驚出於心搐發于脾若發之不止乃脾虛血少也未可以為吉不信醫治之二八而卒每驗發驚

不止者後難收拾也○又一兒痘初見點驚搖不止昏曠不甦而逝

一兒痘出二三日而發驚搖余謂毒不透撒乘於心心受邪而不安治以導赤散加蟬蛻黃連紅花天麻鈎藤石菖蒲治之愈

一兒痘出隱隱發狂不已便秘溺溢余謂毒火鬱結手陽明以大柴胡湯利下而愈

一凡報點二三日其間碎密如麻子者此夾疹也方見前有皮肉鮮紅成塊者此夾

癍也方見前二症有吉凶當究正痘形色而斷

一兒痘已半出喘急腹脹煩躁便秘謔語不寐余謂毒火彌盛以承氣湯得利行數

次諸症悉平而愈

一丙子孟春五日談氏女痘已三日閱歷諸名家皆曰磊落綻凸勿約有喜舉家大

慰居無何乾焦紫黑氣絕而死仍懇諸家往視之則默然無以應舉家哭罷而余至

閱視審詳曰此兒身肢雖冷心胸尚溫六脈雖無而衝脈不絕猶有生氣蓋變色而

死非痘之故也究其初熱時為年糕歲食所傷不能運化以致氣血凝滯不行靜如

死狀用承氣湯以漸灌之則行黑糞二次少間身肢溫熱六脈如原又用補中益氣

湯調理而愈紫黑為紅乾焦為潤諸名家讓三舍而去

一兒痘正出而小便秘余謂膀胱為津液之府氣化則出氣為火食不能傳化故津

液不出而溺閉也以導赤散加疏解藥治之而愈

一兒痘出未齊而腹痛變腐吞酸大便穢臭余謂飲食停滯用保和丸二服愈方見傷食門

一兒痘半出偏身作痛余謂熱毒鬱滯而未盡外出故也以活命飲加蟬蛻一劑而痛愈亦有六淫所感而痛不可不察

一兒痘正出時而痰喘壯熱煩渴余謂肺胃二經實熱以前胡枳殼赤茯苓大黃甘草煎服而安又食少面白此邪氣去而真氣虛也用補中益氣湯調理愈

一癭兒痘出細密如瘡色白乾枯余謂毒盛氣血兩虛之候毒不能盡出透必內攻腹脹喘急而五日不治果已

一兒點報粗肥而有紅盤間有細密隱隱成謂夾疹痘名余視形色是痘紅點是疹盤雖紅而歪斜乃客冒風熱鬱於肌表不散兼食辛物風熱相搏發為水痘夾疹非正痘疹也今內症安寧但表邪未解宜解散之用葛根湯加防風荊芥連翹白芷服之二劑痘成疣疹沒而愈

一兒患痘勻朗粗綻紅澤成曰順不必治偶余過彼招余視形色雖順但左腮腫塊其色青紫熱盛而煩燥不寧余曰先發瘡而後發塊名曰鬼捻以難瘥急宜服紫金錠救焚散稍遲則毒攻心必驚搐不治主人以為謔不從次日果發痰喘搐搦窺視而死

一兒痘三日溏泄無度四肢厥冷痘點隱見余審視其瀉已有旬日乃脾虛之甚也

以附子理中湯數劑瀉漸減而肢漸溫又以補中益氣湯去歸加肉果官桂調理愈
一兒痘四日而尚未齊出壯熱煩躁頭疼喘嗽余謂外感寒邪腠理閉密宜汗解之
以升麻葛根湯加麻黃蟬蛻山查治之汗出如浴痘盡生長前症悉平愈

一兒痘三日而間有膿泡者皆云行漿為吉召余視曰痘尚未盡出而便間有膿泡
者此未至而至謂之太過名曰賊痘為逆經曰賊痘若生諸痘不堪貫汁或問何名
賊痘曰夫痘之成始成終合四時順佈之理初出猶春之生起發猶夏之長成膿猶
秋之收結痂猶冬之藏此自然之次序遞相而成功者也今痘出三四日之間正春
生之候而便間有膿胞者此乃春行秋令金來剋木是謂賊邪故名之曰賊痘也內
經曰逆春氣則少陽不長肺氣內變火無生氣而長養之令不行故痘不堪貫汁也
一兒痘未齊出利下赤白無度余謂血熱毒甚之痘兼有素積以升麻葛根湯加山
查麥芽蟬蛻芎歸等主之稍愈而目赤溺數又犀角地黃湯治之再補中益氣湯調
理而愈

一兒痘出四日反焦紫陷伏煩燥腹飽憤亂不寧皆云逆逆者不必治余同毛小泉
視謂風寒封閉腠理雍塞氣道非表散不可以四牙散桑螵蟲發之升麻葛根湯加
酒炒麻黃以疎肌表山查麥芽以消宿食痘漸生長然尚少神以保元湯加芎歸內
托膿成結疔而愈

一甲午孟春有族姪三歲痘初報點於山根粗肥咸云報點粗肥稀疎可必為順三朝躁熱狂亂母痘塌頰頰隱隱余謂山根部位屬脾雖粗肥形似饅頭乃毒乘脾腎以人牙散又羌活散鬱湯痘齊出稠密臨痘復起以補中益氣湯漿足結疔痕色乾紅少潤唇口裂血腹飽便秘溺赤以滋養清解之劑治之使通安枕又口齟發瘡則以清胃解毒湯加連翹牛蒡子治之愈

一壬辰臘月沈氏女六歲泄瀉旬日報痘患痢晝夜無度痘隱見不振咸用升發藥不效勢在危急余視曰形色淡白少神診脈浮大無根乃大虛症也非附子理中湯不可日進二劑便積少愈而痘覺紅潤脈漸有根然猶飲食不進用補中益氣湯加桂枝炮姜遂能飲食睡卧得宜漿雖充滿而便完穀痘不易結痂以小異功散加木香芍藥又參苓白朮散調理愈

一兒痘未盡出溇泄肢冷搐搦竄視予謂慢脾候以陳氏異攻散數劑愈

一兒痘未齊出而手足搖動醫謂寒顛以異攻投之而愈戰慄余謂顛慄者似寒而寔熱也由筋脈約束不住而莫能任恃風之象也內經曰諸風掉眩皆屬肝木木主風風主動此木氣太過而兼火之化也治宜平肝制火以升麻葛根湯加防風川芎柴胡治之愈

一兒痘出三日夾痲赤色不退壯熱便秘余謂毒滯不能宣發以四順清涼飲利行

二次癩退痘起又以補中益氣湯調理愈

一富兒患痘四朝廷余及同道毛小泉視之稀朗紅潤而神順也順者不藥自安及至七八日漿尚不得行冰陷九日而卒余意此等順症而有變故疑其間必有致毒之由因詢其父乃曰未痘之先嘗製丹砂稀痘等約服之或是之悞乎余曰有是哉蓋痘毒原於有生之始藏於至陰之下必待天行時氣而與相火兩相提携乃能發之于外今丹砂等藥味甘寒而性沉石入心而安神鎮脈以致君火受制相火無委任權力陽氣不能生發以使血脈冰凝毒伏不化也不斃而何哉

一兒十三歲痘已半出勻朗乾紫腹脹喘急煩躁便秘余診六脈沉滑謂此氣血凝滯之症必食物所致明以告我彼曰因食粽四五而熱始以保元湯加酒麩二錢利行二次愈

一兒痘出未齊而頭面浮腫余謂風熱上攻以葛根湯加防風荆芥白芷蟬蛻治之愈
一兒痘出妄言妄見或狂或愚或哭或笑余謂癩症由心血不足而毒火乘之使邪不守舍以升麻葛根湯合寧神湯治之痘齊出愈

一兒痘已出齊粗肥紅澤而頂陷咸謂少起脹欲升發之余視曰內外症平不宜服藥不從以桑蛀虫并升發藥雖行漿而清稀痒塌復求余治以大補益之劑雖愈難為力矣

一兒痘已盡出泪流不止痘不易起脹余謂肝經氣絕而然也經曰木絕則火無生氣治當調脾益腎以培其根肝木自生而長養之令行矣東垣曰滋苗者必固其根正此謂也早服補中益氣湯夕服八味地黄丸而愈亦有斯症不同前治不能起脹而卒

一兒痘已齊出勻朗不易長大瘡色少神能食便澹余謂脾氣不足而然也故曰脾胃充足飲食入胃精氣先輸脾歸肺上行春夏之令以滋養周身之榮衛也然後下輸膀胱行秋冬之令傳化糟粕轉味而出也若脾胃虛衰久不能升則真氣下溜是有秋冬而無春夏生長之用陷于殞殺之氣故痘不易長大而少神也治宜補中益氣而升陽得脾土固則陰升陽降四時之序行矣以補中益氣湯去當歸加桂枝蟬蛻等又保元湯加白朮官桂川芎等治之愈

一兒痘已盡出勻朗綻凸成曰順余謂皮嫩色嬌乃見痘也必有痒塌之患蓋皮在內約束經脈膚在外分布腠理凡痘之出皮厚色老為佳若皮嫩色嬌者皮肉已虛不能約制邪毒故痒癩也治當固中益氣為主不從余治後果痒癩泄瀉而卒

一兒痘四日稀疎紅綻為順余視正額平塌少神煩熱無益以火燭之隱隱于皮膚以如金散發出密如蠶種色乾紫無神乃氣血虛而毒盛逆也六朝痘漸為紫黑喘脹而卒或問痘之變黑者何也內經曰火極而反兼水化又曰火之炎也則紅火之

過也則黑黑乃水之色此兼水化之義也譬炒豆然火微則黃火盛則焦而枯黑矣一兒痘四日勻朗綻凸紅潤而順余視審其煩燥不食睡卧不寧此痘尚未盡出而然也蓋外症之吉凶必審內症之虛實輕重經曰裏症未平痘雖出而毒猶在內治宜升發之以升麻湯治之其痘盡出稠密以補中益氣湯保元湯調理愈

一慎姓子于乙亥孟夏卒然發熱腰疼甚即見痘稠密其色紫黑咸云毒乘腎經而發不治招余視痘已四日審兒胃氣強盛色雖紫黑而有神乃謂主人曰其症固逆喜元氣壯實尚有生意乃以四牙散一服又化毒湯送下地黃丸二服次日痘俱腫脹但色如故以黃連解毒湯加牛蒡紫草歸芍地黃治之而愈故治者不可執一而輕棄之余驗此有感而錄也

一兒痘不易出目胞預浮腫而光亮壯熱煩悶余謂曰痘之初發主於心漸傳之於皮膚之上被風寒客閉皮膚不能發越於外毒留肌肉之間脾主肌肉目胞屬脾經曰毒乘於中則熱熾於外故目預腫也宜疎解之以升麻葛根湯加荆芥蟬蛻連翹主之痘透解毒自自開豁至五六日痘盡起脹目應閉而復開愈

一兒痘已出齊兩目赤腫色見乾紅大小便秘睡卧不寧余視為血熱毒盛不解而上攻於目以犀角地黃湯加連翹牛蒡荆芥治之中病即止而愈

一兒痘四日形色俱白咸曰血虛不附凶也余謂形色雖白尖綻有神種名水白痘

順也以補中益氣湯調養始終無紅盤而愈

一兒痘五日形色少神腹脹喘急腸鳴四肢厥冷或擬內傷者或論伏陷者余視曰內傷者按必痛陷伏者必煩悶今兒便利安寧而虛鳴者乃陰陽二氣不和此傷冷之症也詢其渴飲生冷而兼涼藥內經曰中氣不足則腹滿腸鳴以理中湯加木香陳皮官桂等疏逐冷氣諸症悉平又補中益氣湯調理愈

一兒痘三四日雖齊淡白神疲不易長大少用升發葯并桑蛀虫服之亦不起召余視之見兒安靜便溏曰痘毒俱已外出不長大者乃正氣微弱耳以補中益氣湯加蟬蛻官桂連進二服又保元湯調理愈亦有不從余治執以升發不能行漿痒塌九日而卒

一兒痘已盡出形色無神二便自利四肢厥冷腹脹發噦余視為裏氣虛弱宜用理中湯稍遲則胃氣脫絕連進二服而內氣一煖痘即發光北紅活四肢溫熱又以補中益氣湯加丁桂治之噦止愈

一兒痘四日吐血二三碗痘陷淡白煩躁譫妄肢冷身涼睡臥不寐余審其痘原血熱毒壅未盡出而清涼之其毒乘寒凝泣不能伸越故上逆而吐衄也今毒雖解而氣血虛脫東垣曰血脫者益氣以保元湯加黑姜附子芍歸芍葯蟬蛻粘米治之痘復鼎峻前症悉平而愈

一兒痘出面半已上稠密反滯已下俱勻朗綻澤余謂此名雲掩天庭漿不能滿倒
靨喘脹而卒

一兒痘齊出面半已下稠密反白面半已上勻朗紅潤余謂此名落花滿地以補中
益氣湯破損復腫灌而愈

一兒痘五日左半身稠密紅澤右半身間有數點余謂左屬陽痘發於陽以補中益
氣湯調理愈

一兒痘四日右半身稠密反滯平塌左半身間有幾顆余謂右屬陰毒發於陰逆也
漿雖行不能收斂九日而逝

一兒痘齊出諸處俱勻朗紅潤而腰圍轉稠密反滯腰痛坐立不能余謂毒乘腎經
名纏腰痘不能成漿九日而卒○又一兒痘諸處勻朗紅澤而腰間攢簇如盞許反
滯八朝痒破成坑十一日而卒

一兒痘出中身稠密紅活綻凸頭面四肢全無漿充結疔愈余謂古人曰氣之所至
毒亦至焉何中身氣至而頭面四肢氣不至也未詳其理俟高明教之

一兒痘已齊出遍身稠密頭面全無皆云頭面無為吉余謂陽氣不足不能上升於
頭面逆也又一兒痘似前以補中益氣湯加川芎官桂頭面雖見數點不能起脹而卒
一甲戌有一老夜半叩言孫兒痘出二三粒五朝而復煩躁發熱睡卧不寧余往視

見點報於左右目胞頂平潤大根紅有神此痘隊中之碩痘一名母痘又名報痘時
發痘之時而有是痘也皆兒感受痘之厲氣先發之於外也若故只二三粒之正痘必尖綻而

無前症也以升麻葛根湯二劑果痘復出勻朗紅綻前症悉平愈

一兒未熟先敷痘一點于唇上又一兒未熟先敷痘于左頰一點右額一點頂平潤
大俱五日身熱而復出痘勻朗而順漿足收疤但報痘潰而不斂延綿四七日方愈
一姪女子戊戌孟夏十七日未熟先敷一點痘於承漿頂平潤大余謂曰此報痘又
名屬瘡皆由感天地之沴氣觸動臟毒故先出太驟也廿一日發熱出痘稀朗紅綻
順但為報痘腫連頰下成膿毒化愈

一周姓子三歲戊戌三月十二日痘報于眉心一粒皆云一粒為喜十九日漸平塌
如圍棋大灰白無神痒破煩熱痘復出勻朗紅澤為順余謂眉心屬命門相火毒先
于此地相火受傷諸處雖順恐為獨陰不化也漿行倒靨肢冷喘脹搗搨廿八日斃
一兒未熟先敷痘于心窩一粒又一兒未熟先敷痘于喉中一粒又一兒未熟先敷
一點于腰間又一兒未熟先敷痘一點于頭頂俱五六日而復出痘勻朗紅綻惟母
痘平塌灰白無神痘漿雖滿倒靨喘脹而逝

一凡痘未盡其毒氣尚在內慎不可以大寒大熱之劑寒則毒凝滯不透熱則火邪
愈熾治當平和疏通之劑使痘盡出于外交會得其正不可妄治苟為失正當辨虛實寒溫調適中和而已

痘疹傳心錄卷之七

松江李林馥啟賢氏重校

西吳朱惠明 著

起脹口訣

三四日已來痘出須齊點至足心勢方安宜有隱隱皮膚不見不起若非風寒壅遏必是氣虛陷裏故毒已盡出安靜為貴能食為強安靜則毒邪外解能食則胃氣純良痘齊起脹氣尊血分身表溫涼涼則氣血和平痘色必然潤澤溫則腠理疏通其毒易於成漿故至此而身宜微熱若然冰伏痘瘡勿長五六日來血泡已成候當肥綻而粗頂宜發光而瑩故根紅而頂白者已具行漿之勢若過頭而色赤者則毒妄叅陽位雖起而空殼虛名內含清水皮薄而光亮如燈頂尖而根脚不紅者氣血虛而不勝其毒此候難望功成毒壅而不起者為陷伏候氣弱而不振者為乾反形或有肉雖腫硬而痘反不起者漿則滯而不行面已虛浮而痘反退伏者毒則遏而不伸故身不熱而痘不起已成冰硬之形赤色若還不變溫之可起氣血虛而不振補之可生紫色乾枯切忌溫中帶補只宜活血鬆肌毒因壅滯疏解更為活法透肌還是良醫溘瀉惟以溫補泄其佐以升提此是先賢之秘訣以為後學之良規

一痘瘡出齊後計時當起脹必是先出先起脹後出後起脹根窠紅活頂峻肥白脚斂圓淨堅實礙指此氣尊於中血附於外順也若灰滯黑陷形匾色枯皮薄脚軟斜

視若無根血不附此毒參陽位逆也若形雖平而血附色雖滯而有神形色逆而內症平和此險之可治也虛宜補益寔宜清解斯無失矣

一華佗曰氣尊血分者生毒參陽位者死氣尊血分之候痘鼎峻而白根紅而不散

候陽位者氣位也痘起脹頂色乾紫及滯根血散漫地界不分譬如血豬肝色也亦有正氣足而毒盛者痘起脹而頂色紫滯根血紅澤而斂乃險症也宜涼血解

毒為主可謂達真元之本履生死之門執施治之鑰者也蓋痘者二氣之毒起於血而

統於氣氣足以領血則氣升而血附君令臣從此順道也故曰氣尊血分者生也

氣失其政則毒火亢盛妄行游布毒參氣位氣位即痘粒之上也乃臣奸君象此逆道也故曰

毒參陽位者死也此本之魏氏論氣血盈虧交會圖說所以濟華佗之不及可為不朽名言矣

一痘起脹時頂平脚塌根窠散而不附頭面皮肉紅腫如瓜狀者頭面浮腫如錫餅

形者皆為不治若未發而先腫及已發而皮肉平穩者亦皆不治

一或問痘起脹有目閉者有目不閉者何也曰痘稀毒輕者目自不閉痘密毒盛者

目自應閉若當閉而不閉者氣虛也宜補中益氣湯治之閉則吉否則凶當不閉而

閉者毒盛也宜清解散治之然目閉之症必待收疔而漸開者吉也痘未蒼老或漿

行未滿而漸生痒塌腫消目開者凶也愚按腫消目開之症補托而復得腫灌目閉

為吉

一痘起脹時而吐蚘蟲者何曰乃熱毒怫鬱於胃因不能食其虫為熱所逼但聞食氣即上湧吐出治以安蟲湯亦有不治者

附治驗

一兒痘出勻朗光澤惟清飲不食聞氣即吐蚘蟲漿半足眼扎不止

肝木乘脾也

腫消目

開倒靨而逝

一兒痘紫色而不起脹余視謂毒盛壅遏以紫草紅花蟬蛻煎湯調獨聖散服之又以犀角地黄湯治之紅潤起脹而愈

一痘起脹而其中有先起虛大色如黃金者名曰賊痘宜剔破以天水散敷之涼血解毒散加人中黃服之大而黑者名曰痘疔急用銀針挑破口含冷水吮去惡血將四聖散點入痘內服解毒湯救焚散治之若疔少而根窠紅活者可治疔多根血不活腰背胸前多者不治也

一兒痘五日紅紫而不光澤余謂氣弱而毒滯不化先以神攻散發起後以保元湯治之愈

一兒痘六七日不能肥脹寒戰咬牙腹脹氣急余以奇攻散服之痘即光壯諸症悉平又補中益氣湯治之愈

一痘分珠起脹縱凸根血少神余謂血虧氣弱以十全大補湯治之愈

一痘起脹乾紅焦紫煩渴便結根窠堅寔余以人參解毒湯治之而愈

一痘六日而不起脹灰白平塌泄瀉昏睡余以四牙散發起以木香散數劑而愈

一痘六日起脹形色俱順不食引飲余謂胃主納受不食者胃弱也以調脾內托散治之而愈有毒壅脾胃而亦不能食不可不知也

一痘六七日不易起脹反加痰喘嗽甚飲食入口即噉而吐出余謂毒氣壅塞肺胃以清解散治之而愈

一痘六日不易肥綻頂陷不起余謂正氣有虧不能逐邪盡外出以攻毒湯獨聖散又大保元湯治之愈

一痘雖起脹紫色焦枯妄言澹語余謂血熱亢盛以退火回生丹又無比散治之

一痘雖順而利下黃赤膿血壯熱煩渴余謂毒入大腸以三黃丸解利其毒又補中益氣湯治之而愈

一季夏一兒患痘六日起脹而利下膿血壯熱煩渴余謂暑熱不解而兼毒入大腸先以十味香薷飲清其暑次以補中益氣湯調理愈又一兒仲夏發痘其症類前但初勿藥而暑毒不解利行無度漸倒陷而二七而逝故經曰險者治之吉不治者凶蓋可見矣

一兒痘七朝四肢厥冷減食召余視詢謂血熱而服冷藥太過以致肌表冰伏不易

成漿以保元湯加丁香官桂炮姜治之而愈○又一兒痘症如前余以附子理中湯治之而愈

一兒痘勻朗不易肥大而色淡白煩躁不寧余視謂頭瘡肥盛耗洩真氣故有前症以綿紙揉軟用白芨膏糊貼患處又保元湯助之痘豁然光壯而愈

一兒痘出勻朗紅澤但日夜啼哭不止余謂肺主哭尤肝木勝而反侮之又曰木勝則火熾而刑金以瀉青丸料合導赤散加黃連治之愈

一兒痘六朝而未起脹煩渴便閉咸以保元湯助之而愈煩渴余謂曰毒未盡外解而溫補則毒蘊畜而不能化漿以清解之劑而肥脹又保元湯治之愈

一兒痘六朝稠密形色平塌黑滯有言雲掩天庭不治有擬鎖項鎖胸鎖背不治召余視曰形色固逆而四肢紅活綻凸唇舌紅潤審其起止安寧飲食如常二便清調雖毒盛氣血不足幸脾胃強健譬樹之枝葉雖枯而根本猶活宜以補養氣血而兼固脾胃之劑可保無虞即以補中益氣湯加紫草蟬蛻牛蒡之藥其逆痘俱半漿而破漏結疔發疔癰數處愈

一兒痘七朝勻朗粗凸亢熱便秘狂煩余視兒舌胎黑有芒刺痘空處隱見黑點初感疫癘而發失于解散故有是症詢之果然當用大承氣湯利之使熱毒得洩次理氣血可也渠恐下耗其元不從而逝○又一兒患痘半出視之為疫癘所感與前症

仿佛投以十神解毒湯解散其邪次以升發其痘豁然生長而愈以二証參攷之益信毒邪之貴解散也

一痘起脹喘急渴瀉余視痘雖稀朗而色嫩少神皆由洩瀉以致元氣下陷此乃氣虛發喘也以補中益氣湯加肉果主之愈

一兒痘六日而不肥綻勻朗乾紅煩燥不寐余曰毒壅而氣血不宣通故也宜升發而兼清解或曰痘必藉氣血乃發而解不肥綻氣不足也色不潤血不榮也煩渴者津液竭也宜補中益氣為主解散則耗其元不可即用保元湯一劑而兒反煩劇悶亂色見焦紫復叩予曰兒痘比前增重試如先生升發兼清解可乎予往乃以枳殼湯先解其悞服復著之滯次以犀角地黄湯加蟬蛻牛旁紫草等二劑頓清其壅滯之熱七朝前症悉平方以保元湯調理而愈信乎毒未盡外解而遽行溫補黨邪之害可畏也

一富貴家兒痘症易出而不易肥大馴至自汗微渴平塌灰白皆險惡症也召余視之詢知為過服疎散之劑因致表虛故有是症古人曰治痘當審兒家貧富何如不可概投疎散等葯蓋緣貧賤家兒愛護不周風日暴露拖泥就濕滋味淡泊表裡堅固施以疏散猶之可也尚當中病即止不可太過若富貴家兒煖衣厚味少見風日手抱不着地氣臟腑嬌脆腠理不密一或疏散則虛者愈虛前症悉見勢所必至經曰

疎表則易寔表則難治以固元實表之劑保元湯倍加黃芪連進數劑而痊否則變為痒癩泄瀉危亡可待乃曰天之所命非人所為吾不信也

一兒患痘雖稠而根窠堅凸正起脹時忽爾泄瀉一醫擬曰痘最忌瀉耗其元神執用益菴丸溢之余適至視其色赤詢其初發登圍便結已六日矣血熱毒壅正宜瀉其火毒治宜清解為上苦溢之劑非也若毒火壅滯後必損目發癰者有矣主人曰瀉則耗其元不從即以豆蔻丸又保元湯加肉果官桂等治之痘雖結痂而目腫赤四肢發癱身熱不已主人悔之復來謁余求治曰毒滯諸經病根固矣復以清涼解毒等劑命雖獲全竟害一目一肢苦溢之害詎不信歟○又一兒患痘類前余謂熱瀉以犀角地黃湯加木通桔梗川芎投之二劑色紅潤瀉止余再視曰內外症平不須過服藥矣

一兒五歲患痘五朝勻朗綻凸醫咸曰順召余視曰痘雖順但嫌嬌紅嫩熾者乃脾胃氣弱也主漿滿而不能蒼老猶防泄瀉瘙痒倒靨之變治宜以黃土水煎保元湯送下參苓白朮散得脾土固而無下陷之患可保無虞主人曰期正發漿之始何苓朮燥濕而滲泄耶不從治以保元湯至八朝溏泄四五次漿滿而縮倒靨煩躁二六而逝余每驗數兒犯此候二十四日而卒○又一兒痘症類前余以前方治之九朝漿清而靨結如麩幸能食便調發毒愈

一兒患痘五朝嬌紅嫩爛咸曰是痘不能蒼老結疔召余視痘之形色果矣觀其肌白嫩經曰肌色白嫩則皮薄嬌紅可保無虞以保元湯加官桂白朮調理而愈

一兒六歲患痘六朝召余視余曰正面勻朗綻凸少神身肢匾塌色黯其故因四肢肥瘡腫潰泄其真氣故也此症主漿雖滿恐不能蒼老結疔當以保元固脾之劑人參黃芪甘草陳皮防風白朮官桂芍藥川芎治之若元氣實脾土固方可議其生主人以為然從此調理而愈○又一兒患症類前但以人參黃芪甘草糯米官桂川芎保元而不固脾土九朝漿雖滿而不能蒼老結疔飲食不進泄瀉外剝而逝此不固脾土之明鑒也

一兒痘六日勻朗綻凸但色黯黑滯咸謂血熱毒壅治以清涼活血解毒之約主人不以為然召余審得人事安宜二便清調原兒肌體粗黑之故經曰人黑皮粗痘色必然慘黯擬血熱症非也以保元湯調理愈凡臨症當審察詳辨診切視聽此乃醫家之要術不可不知也

一兒痘初報點于下頰腎屬也兩腿作痛三陰不足也形平隘氣不足也而色少神血不足也便溏脾土

弱也六脈沉弱五朝尚色黯不起有血凝氣滯之象余謂氣虛脾弱之症治宜大補中益氣為主以補中益氣湯加蟬蛻羌活肉桂二劑而起脹繼以保元湯加白朮肉桂陳皮調理八朝溏泄不已加木香訶薤治愈

一兒痘正起發時而便血倦怠少食作渴四肢逆冷召余視曰倦怠便血者脾虛不能攝血也少食作渴者脾虛而精液衰少也肢冷者亦脾虛弱也以四君子湯加陳皮升麻丁香炮姜治之愈

一兒痘稠密未起發而唇先黃熟目先虛閉喉咽腫痛飲食不能召余視徧身俱平黯幸正額勻朗紅潤唇雖腫而紅活審其欲食而不能以甘桔湯加牛蒡連翹荊芥山查陳皮人中黃等清利咽喉膈間而解脾毒愈

一兒痘遍處皆起脹惟四肢不起發余謂四肢主于脾乃脾虛也用五味異攻散加防風白芍藥治之愈

一兒痘已起脹醫擬氣血不足用保元芎歸治之而加飧泄填脹余謂氣不能上升以補中益氣湯加附子二片升麻柴胡酒炒以助上行服之二劑愈或問其理何也清氣在下則生飧泄濁氣在上則生填脹是以清氣一升則濁氣隨降而症悉平矣參芪等補劑皆味厚而氣滯者若不以升柴葯提之何以得行于經絡肌表而滋補哉一兒痘勻朗綻凸紅潤但胸前攢簇如蠶許灰色召余視曰鎖胸症不治何也按兩乳中間者臚之位經曰臚中為氣海氣海受傷不能分佈陰陽經所謂陰陽離決精氣乃絕此之謂也後雖漿滿而不蒼老胸前痒塌潰爛諸痘俱倒靨喘脹二六而卒一兒痘起脹而不易行漿肢冷腹痛余曰原其血熱症而投涼藥太過以理中湯加

炮姜官桂木香一劑而愈

一兒痘起脹紅澤綻凸能食便調召余視曰順不須服藥自以保元湯益之而反增煩熱渴衄潰爛難收復求余治余曰此表裡俱寔而藥又寔之所謂寔寔也經曰脾移熱于肝則為驚衄昏補之過也人但知妄下則脾虛不知妄補則脾寔反增潰爛也以四順飲下之又清解之劑愈

一兒痘雖起脹淡白少神溇泄口渴作痒不已召余視曰此乃脾胃氣虛也內經云夫胃者水穀之海六腑之大原也五味入口藏於胃以養五臟胃氣既虛則水穀不化津液內竭不能輸精於皮毛氣失其衛血失其榮不能釀毒成功毒灼于皮膚故痒也以補中益氣湯去當歸加桂附糯米愈

一痘六日綻凸焦紫煩渴悶亂喘促厥逆余謂陽毒內陷熱氣逆伏經曰熱深厥亦深火極似水之義以四順飲利行二次諸症悉平又清解之而愈

一痘六朝勻朗頂陷皆云頂陷而為氣不足欲投保元湯余審其生長有序光澤明淨內症和平乃不虛不實之症若悞用藥餌反傷胃氣經曰諸病皆以胃氣為本若胃氣有傷無以滋養心肺而為倒靨者有矣今不虛不實但保其中和使脾氣流暢則肺經藉母之助易于灌漿成疔而脫痂矣不宜服藥主人從之果愈亦有內外和平妄以補托之劑而加煩熱便秘或目疾癰腫者有矣

一兒痘出勻朗綻凸但枯燥而不肥澤皮膚皴揭謔妄便結余謂血虛也經曰諸溢枯涸乾勁皴揭皆屬於燥又曰燥勝則乾治以養血解毒清金潤燥之劑以保元湯合四物湯加麥冬治之愈

一兒痘稠密綻凸但色紫黯壯熱謔語狂煩目赤便秘余謂毒火亢劇以四順清涼飲加大黃六錢微利二度其勢稍減再以前劑服之又利二度病去其半再以前劑加人參三錢前症悉平色見淡白精神疲倦余謂邪雖去而正氣不足宜大補之劑以保元湯加歸芍芎朮治之愈

一兒夏月痘起脹而乾紅壯熱舌燥煩渴不眠溺赤余謂內外極熱以黃連解毒湯合化斑湯治之愈

一兒痘起脹勻朗紅澤但眉心五六攢簇灰色平塌無根余謂眉心命門所屬痘既無根相火受傷不能收拾痘雖漿足結疔而眉心痒塌不痂二八而卒

一兒痘六日稠密紫滯平陷不起脹煩燥悶亂余謂毒盛壅遏但分珠脚斂可治以人中黃每服三分酒漿調連進二服色漸紅活又犀角地黃湯加牛蒡蟬蛻痘綻凸起脹愈

一凡痘易起脹者慎不可與毒物發之恐中氣虛痘難成功也不易起脹者即微發之發之不起宜重葯攻之中病即起又有毒壅滯而不易起脹者升解為主有正氣

虛不能起脹者溫補為主有脾虛泄瀉元氣下陷而痘不易起脹者補兼升提為主
一兒痘起脹煩渴飲冷水不已余謂陽盛者飲冰雪而不知寒又曰大熱而甚寒之
不寒是無水也治宜壯水之主以鎮陽光以六味地黄丸料加麥門五味煎與恣飲
熱渴頓止愈

一痘盡起脹頂平而色淡白渴瀉肢冷喜熱飲余謂陰盛者飲沸湯而不知熱又曰
大寒而甚熱之不熱是無火也治宜益火之源以消陰翳用陳氏異攻散又八味地
黃丸治之愈

一痘五朝紅澤勻朗頂平陷痰嗽連聲不續謂傷風失於表散邪客肺經治先清肺
否則氣道不清養漿時難以補托用前胡甘桔黃芩花粉桑皮杏仁陳皮痰嗽稍緩
但漿不易充用保元湯加貝母陳皮桔梗漿足收斂愈

一兒痘八朝患症似前初失清解臨危難治用清補兼行不效聲啞嗆水飲食不能
倒靨喘脹十二日而卒

痘疹傳心錄卷之八

松江李林韻啟賢氏重校

西吳朱惠明 著

養漿口訣

七日之期順痘漿行半足危瘡纔發微光毒壅則頂滯乾紅氣盛而充肥光澤頭面
行漿而四肢未起切弗慌張身肢虛泡而臉額焦枯且休歡悅氣虛而淡白少神根
紅猶為善治毒盛而紫黑乾焦脚赤亦屬難醫色嫩而兼塌潤漿汁必虧皮薄更見
嬌紅清稀不免黑陷乾枯急宜攻發莫紋平塌當用溫補飲食減少而使溘本從虛
論熱盛秘堅而煩渴還作實看火侮肺金痰涎喘嗽木乘脾土目劓無休肝絕則淚
流不已胃敗則噦惡頻來腹脹氣急毒逼內攻錯喉音啞火壅咽脫漿清作痒皆由
肺氣虛寒驚悸謔言只為心經不足漿行已半未宜收斂膿厚色黃纔應結疔若爾
一齊收斂名曰倒靨莫認為加再宜攻發得宜此症猶堪再活復腫行漿危症
也當善治

漿原

痘初出一點血血化為水水化為漿漿漸厚為膿膿成結疔自然之序也漿始而色
白者天一生水之義也膿厚而色黃者陽明脾土之正色也蓋漿之原腎水以始之
肝血以榮之肺氣以資之心火以運之脾土以收之可見一物一五行之謂也

一痘養漿乃成實之令肺金用事然必藉母之助以充實其膿漿蓋脾土為母若脾胃強能食使則氣血充實而中陷者盡起頂平者盡峻飽滿者光榮先長者先作漿次長者次作漿循循有序順也脾胃弱難炒便則氣血衰微不能助痘成漿險也宜保元湯加白朮肉果陳皮官桂川芎治之脾胃損嘔噦不進則氣血澆漓痘無漿汁必喘脹悶亂痒塌倒靨噦惡泄利等症逆也

一痘養漿而內却無水乾涸空虛此氣虛伏陷也若得人事清爽飲食如常痘無損處宜補中益氣湯歸茸主之若喘脹噦瀉煩悶外剝者不治也

一養漿而瘡頭有孔膿水漏出堆聚乾結其色灰白如天泡此名漏瘡乃不治之症一有清水非膿無事自破水出而乾黑不成痂者凶也

一痘稠密白色正養漿時而昏睡不醒妄言謔語余謂心主血血者心之神心血虛神無所依而然以保元湯加當歸麥冬棗仁茯神生地等治之仍不醒凶

附治驗

一養漿時大便下血或下黑糞或昏睡不醒或多睡者蓋心主血血虛邪因而入心神昏亂之故也宜犀角地黃湯安神丸若毒盡外出當以補中益氣湯加門冬生棗仁主之予驗徐氏女犯此症十二日而卒

一養漿時驚搐不止余以養血安神丸治之愈每有服藥不醒反加昏亂者不治

一痘八日空殼不成漿余謂氣血不足不能振作以制其毒用補中益氣湯治之發疔四五而愈經曰發疔發癰者生此之謂也

一兒九歲仲秋患痘八朝頂陷漿滯不行色見焦紫余視為外感風寒壅塞腠理氣血凝滯之故宜升提發散之劑紫蘇飲恐藥難頓達於面手足服藥之後宜用水楊湯浴之其藥氣藉此升提斯毒氣藉煖氣而發主人從之用水邊楊柳五觔以長流水一大釜入楊柳在內煎六七沸先取三分之一置浴盆內候湯溫和先服前藥然後浴洗但兒力弱只浴頭面手足良久漸有起勢痘即光澤遂以補中益氣湯調理愈或有浴後不起反加煩悶氣急者不治凡用此湯必其氣血充足的為風寒壅閉者則可不然反踰虛虛宜斃臨症不可不察也

一兒痘漿不易充而色淡白余謂脾胃氣虛以大保元湯主之又以歸茸湯益之愈一痘八日漿半足而煩渴甚甚飲引不已一醫治之以保元湯而愈加煩渴余曰此藥治稍渴則可今已渴劇當倍加人參為妙主人曰乳下嬰兒重補恐作喘脹曰譬之一杯水能救輿薪之火哉今兒煩渴已甚藥力輕微何能中病從此數劑繼以人參三兩麥冬兩半煎湯頻進漿滿渴止愈

一兒痘養漿時而嘔穢不止漿不充滿余謂胃氣不足也夫人以胃氣為本胃者土也土敗則木來侮之今木挾相火之勢上乘于胃其氣自臍下直犯清道上出於貴

門也故嘔噦者土敗之象也內經曰絃絕者其聲嘶木陳者其葉落病深者其聲噦不治之症也

一兒五歲患痘七朝微熱口渴自利醫擬木香散服之余視其利下皆臭滯陳積因腸胃熱蒸而下也此但虛而無寒只宜保元固中之劑治之自愈且陳氏立木香異政之時必挾寒而虛者用燥熱補之若不挾寒而用寧不過於熱乎若或悞投禍不旋踵從治之而愈

一兒痘正養漿而喜笑不止余謂心火主笑經曰神有餘者笑不休以保元湯加人中黃黃連治之愈

一痘養漿時壯熱煩渴舌乾唇燥咸謂津液不足以保元麥冬而愈煩渴痘色乾紫余謂重廵厚被煖炕紅爐况痘原血熱而反助其熱可即撤去紅爐令其清涼以黃連解毒湯加牛蒡治之而愈

一兒痘已成漿痒破不已余謂衛氣暴洩津液不榮譬諸草木剝削其皮枯萎而死但得能食便調腫灌結疔方可無虞用四君子湯加川芎芍藥陳皮主之果復腫灌間有成瘡愈

一痘八日倒靨而色灰白泄瀉煩渴咬牙寒戰余謂氣血虛寒以異攻散治之愈間有醫之不止反加昏悶者死

一痘妄言卓立日夜不能眠坐至七朝尚不安寧余曰形色俱順而妄言卓立者心肝二經火熾也以犀角地黃湯加柴胡龍膽草棗仁治之愈

一凡痘黑陷倒靨漿半足而痂也腹脹悶亂若熱症宜奪命丹或五毒丹治之虛症宜保童

丸補中益氣湯治之

一或問養漿而脹痛者何曰氣滯也宜行滯散主之一有漿滿足而脹痛者勿藥自愈如表實過用溫補而痘脹痛者枳殼湯主之

一痘漿滿足而身痛不已余謂諸痛為實以芍藥白芷陳皮甘草牛旁連翹山查治之愈

一兒六歲痘七日根窠赤痛便秘溺赤煩躁飲冷或用清涼解毒之劑未應余謂熱毒內蘊以大黃當歸赤芍甘草一劑又用犀角地黃湯治之而愈

一痘八日根窠赤腫脹痛煩渴飲冷便下黑血余謂熱毒蓄內迫血下行以犀角地黃湯治之而愈

一痘八朝漿滿而身熱煩渴咳有痰涎余謂毒火盛而津液涸也以白虎湯治之而愈

一痘漿足痰喘氣急便實余謂肺氣實熱而過於補益故也以枳殼湯加牛蒡子連

翹花粉腹皮治之愈

一或問漿滿忽爾泄瀉漸而漿縮者何曰皆由脾土有虧漿雖滿足因泄瀉以致元氣下陷故也當以肉豆蔻丸澀之以黃土一塊放碗內以百沸湯泡取水少加沙糖調參苓白朮散益之使脾土固自然漿復充足成疔而愈

一痘漿足膿俱紫黑熱盛便秘余謂血熱毒壅以黃連解毒湯加牛蒡子連翹治之愈

一凡漿足而不易蒼臘色者脾主結疔脾弱之故也宜保元湯加白朮芍藥陳皮官桂蓮肉收厚磨者古磨如麩薄者參苓白朮散主之

一痘漿足不易磨腹脹發熱面赤午後益甚按其腹不痛余謂脾虛血少用歸芍六君子湯加陳皮姜棗數劑而愈

一兒五歲痘七朝勻朗綻凸紅澤而有行漿勢能食便調但兩臂膀腫痛如爪之狀余謂手三陽虛則毒凝滯不散也經曰虛之所在邪必轉之補其陽氣腫硬自消矣用人參黃耆甘草桂枝當歸山藥陳皮白芷羌活防風人中黃治之其漿足腫漸消而愈 又一兒患症如前不以前法治之痘雖漿滿結疔其腫不退成膿損一肢而愈

一痘七八日痘痛不已醫咸以痛為邪氣之實也欲疏解之余視曰痘發于皮膚肌肉之間氣以响之血以濡之毒氣變化而未成鬱而作痛此其常也乃不虛不實不

宜服藥若與疏解恐耗正氣經曰良將用兵善攻不如善守又曰悞服湯丸不如勿藥主人從守之愈

一痘成漿作痒爬搔潰爛余謂火濕併作也脾屬土而惡濕濕熱浸淫故痒而潰爛也譬猶禾稻將收宜燥其田以流濕調脾收斂之劑復加腫灌成疔愈

一免痘九日痘色灰白溤泄厥逆余謂元氣虛憊陰陽不相交接而四肢為之厥冷也以陳氏異攻散治之愈

一免痘九日無漿倒陷余視根窠斂束以保元湯加穿山甲川芎官桂服之又以水楊湯浴洗頭面手足良久而復起成膿愈

一痘漿充滿忽爾一齊結疔乾紫能食便調余謂火迫而收之太急乃倒靨也以補兼攻發之劑十四日四肢腫痛成癰膿成毒化而愈 又一免症似前不食便溤藏

倉余謂內虛倒靨毒歸于內喘脹而卒

一免痘漿充滿腹痛泄瀉咸謂脾虛以保元湯加白朮肉果陳皮木香芍藥治之而加裏急後重余謂飲食凝滯為積作痛宜用靖寇安民之法以厚朴陳皮甘草麥芽山查神麩枳殼砂仁治之二劑痛止便利余謂食滯已盡宜補托之以前方調理愈一男子痘漿充滿根血淡紅痰涎壅盛日晡潮熱皆謂氣血不足以保元湯加芎歸貝母陳皮治之不効余謂陰虛火動生痰以六味地黃丸料加參附肉桂治之而疾

絕熱去又補中益氣湯而愈

一兒痘漿充滿痰盛少食便溏余謂脾胃虛弱不能運化精微津液凝滯所致以六君子湯加炮姜治之而愈

一兒痘漿足忽泄瀉身冷自汗余謂脾胃氣虛以保元湯合附子理中湯加肉果治之愈

一痘漿正充足寢中汗出如浴覺來則息余謂盜汗也屬陰虛治宜補陰則火自降以保元湯合四物湯加浮小麥治之愈

一女十四歲痘漿正充足忽腰痛不能轉側余謂痘順審其經血去多之故以六味地黃湯加歸芍續斷杜仲治之愈

一痘倒靨黑色能食便下膿血余謂脾胃強盛毒雖倒入而能食可治也經曰脾病則五臟危今脾土既盛調理無虞以補中益氣湯加人中黃牛蒡子治之愈 又一兒痘症似前便行完谷雜下余謂脾虛以理中湯治之亦有不應藥而卒

一痘漿足漸而蒼老余謂中病即止不可盡劑宜靜守之不從謂曰脾主結痂治宜調脾助其結痂用小異攻散加芍藥山藥而喘渴身熱復求余治余謂內外皆實而妄用實補之藥正所謂盛盛也內經曰陽盛則外熱陰虛則內熱內外皆熱故喘渴也以寬中湯治之又口齟齬發以清胃解毒湯治之愈

一痘養漿時昏睡不甦便溏能食余謂曰脾主氣因便而脾虛倦怠而昏睡也以歸脾湯加山藥芍藥米仁蓮肉治之愈亦有不應藥者二七而逝

一痘養漿時而使溏不已能食聲清余謂曰能食而便者可治不能食而便者難醫今兒能食而使知有胃氣經曰有胃氣而生以保元健脾之劑服之而愈

一兒痘九日正面平塌無漿自口以下俱紅綻能食便溏余謂元氣不足不能升於上以大劑保元湯白朮芍藥附子官桂肉果升麻十一朝空地補出贈痘諸痘俱行漿又小異功散調理愈

一痘正面漿足結疔能食便溏完穀身肢無漿余謂脾陰不足不能以統灌以參苓白朮散加附子菟絲子肉果又河車散愈

一痘九朝漿清作痒用大補氣血之劑其痒不止余用花椒一兩為末滑石末二兩和勻用生絹囊之摩按痒處愈

一痘養漿時根窠紅艷下午愈甚潮熱便溏天明而紅稍淡身涼下午復然余謂脾胃氣虛虛火盛而紅乃虛紅也治以保元調脾之劑愈亦有誤謂血熱用涼血藥灰白痒塌外剝而逝

告廣版出局書堂項千

汪東亭著道書

新安汪東亭先生道學巨子也自弱冠勵志研究六十餘載卒因至誠至誠感格幸獲真傳即著書進工續德業行竟至功成起凡生平著輯不啻道學南針較前代丹經尤為清顯透徹本局所專營經史丹書茲遇今代大家著作故特託至友商請其哲嗣汪甄青先生將家藏著輯各種秘本由本局印刷發行俾可公諸海內同志以宏道宗幸蒙先生允許已擇要者先行出版茲將書名列下……

道統大成
每部十冊
定價五元

仙佛合宗
每部四冊
定價二元

三教一貫
每部二冊
定價一元四角

性命合編
每部二冊
定價一元二角

仙佛真傳

每部二冊定價四角

求仙學佛之言歷來不可勝而直指真詮不為譬喻惟柳華陽禪師金仙證論慧命真經二書最為切當學者能於此兩編研究精深貫通會要庶于仙佛兩度由藩籬為門戶以企至于入室升堂不難矣茲用潘刻重付石印

莊子因

每部四冊
定價四角

莊子雪

每部六冊
定價六角

痘疹傳心錄卷之九

松江李林藪啟賢氏重校

西吳朱惠明 著

收靨口訣

痘瘡九日已結痂死如少不順方作膿窠漿成蒼蠟自宜次第收功陽亢陰虛必至停漿不靨痰壅而目直氣促血少而癩癢驚癇氣虛而倒靨黑焦脾弱而痂粘麩薄一則溫補可興一則攻發而活能殮便結實則無邪泄瀉安寧虛而少毒肺寒利下膿粘溫補為上臟毒必然使血解利為先前發太過必爾潰爛難痂喘脹膨脝皆因半漿收靨錯喉音啞漿行飽滿無妨塌痒咬牙便實聲清可治靨來蓋硬變症終無痂結如麩須愁餘毒胃氣絕則口唇硬腫肝熱甚則目睛障白喘急發于瀉後總是氣虛而斷便結繼以渴煩皆由實熱而然泄瀉而煩渴不止理宜補益升提好飲而發渴愈甚經謂須分虛實內虛寒戰痘瘡無痒只溫經漿足難收便結熱蒸須解利進清涼以助結痂慎補法以防過益調氣血而得成功健脾胃而能收拾

一或問曰痘漿充滿候至結痂未知收拾何處也曰痘之膿漿雖是腎浚其源肝澄其流而發達榮養者脾也脾氣足則土來制水而乾于是邪氣散于外元氣歸于內是知痘始管紐在脾而終亦收功于脾此陰也故曰脾土固則痘易收脾土弱則痘難收拾可見土者物之所以成始成終也須從口唇兩傍收靨由胸背收至兩腿然

後脚上與額上一齊結疔乾圓堅厚如螺螄者乃毒從外解上也頂破膿出堆聚如桃膠者次也破損而復腫灌結疔者又次也清漿收靨如麩紙之薄而乾枯者險也破無漿汁或清水不成疔或漿汁腥臭或無漿而結疔皆逆也

附治驗

一痘漿足渾身臭爛十一二日而尚不收靨粘衣余謂發之太過而又過補致使潰爛不能痂以枳殼湯加芍藥米仁牛旁防風治之敗草散敷之愈

一凡痘漿滿破損而倒靨者乃正氣不足用補托之劑而復腫灌成漿者吉亦有補托而復出一番贈痘于空處者此乃正氣不虧邪氣不留故復出于外雖過期延日亦不為害若補托不灌不腫贈痘不補安可治哉

一兒未週患痘稠密灰滯九日而尚空殼能食便結余輩謂氣不足倍以補托十一朝復出一番贈痘於空處灌漿而愈

一兒痘過期不易結疔余謂熱毒鬱蒸陽氣太盛無陰以斂之以清涼解毒收斂之劑又滾水調沙糖湯飲一二日結疔而愈又有因泄瀉而元氣外耗陰氣太盛無陽以斂之以木香異攻等治之愈

一兒痘過期不斂便溏安靜四肢少溫余謂脾氣不足以人參附子白朮茯苓陳皮甘草山藥木香肉果芍藥治之俱破損不成疔而愈

一痘收靨時而利下無度余謂水穀不分完谷不化此毒氣反驅脾虛不能制水以參苓白朮散加肉果芍藥為末煎參湯調下愈

一兒仲夏患痘漿足收靨而溺赤短澁外腎膚囊赤腫通明余謂膀胱熱甚毒氣流於小腸而然也以八正車前散又化毒湯治之外消散敷之愈

一兒漿足收靨大便紫血不已余謂脾弱不能攝血歸經血隨火動妄行而便血也又云陰絡傷血從下行而便出以歸芍六君子湯加炒黑荆芥又獨參湯間服血止愈

一痘收靨乾黑黏着皮肉不脫身熱煩渴睡卧不寧咸云氣血不足大補益之四八日枯槁而卒 又一兒痘類如前余謂毒火彌熾經曰火盛則水竭以犀角地黃湯加連翹牛旁治之火漸少而諸症悉平痂漸脫愈

一痘收厚靨而乾黑粘着不脫身熱煩渴妄言謔語睡卧不寧余謂陰虛火盛以四物湯合生脈散加酸棗仁治之愈

一痘漿足收靨內復潰而生蛆余謂陰陽之氣鬱遏而生所謂氣化而生也川花椒湯拭之又清涼收斂之劑而愈 又一兒夏月出痘生蛆余謂蠅種此形化而生也以青帛蘸礬湯拭淨謹其幃帳愈

一痘如結如疔薄粘着皮肉不脫昏睡內熱余謂脾虛少血之故以調脾養榮湯治

之愈

一痘清漿結疔如麩余謂正氣不足不能化毒盡解以補中益氣湯加穿山甲治之
兩曲池發癰膿成而愈

一兒痘漿足收疔淡白如麩減食便溏余謂中氣不足以參苓白朮散加肉果陳倉
米治之愈

一痘收疔咳嗽咽膈不利余以甘桔湯加牛蒡子陳皮連翹射干玄參治愈

一痘收靨喘急腹脹皆謂倒靨不治余審其漿足如期厚疔向因能食過傷所致非
倒靨而逆也以保和丸消之愈

一痘收厚靨而色乾黑身熱喘嗽余謂風寒客肺以麻黃湯得微汗而愈

一兒四歲痘出稠如綴粟平塌嬌紅血散不附唇口腫硬剝落一層又一層皮薄空
漿破無血汁溏泄煩渴皆為逆候但能食安靜謂曰有胃氣則生用人參芍藥黃連
各二錢甘草一錢日服三劑十四朝肢厥脉沉痘咸倒靨靜如死狀心胸尚溫次日
漸甦而愈

一兒痘勻朗紅綻咸曰順九日漿足能食便調恃其順與粘米團鴨肉熟粟食之腹
脹痛停漿色滯用消化藥而便行安枕痘漿不長謂曰食物已消正氣受傷治當調
脾益氣助漿收斂之劑不從同道少屏力主補益又不從十四朝內虛倒陷漿化為

水而復行補益不効喘脹而卒人實使然於天何尤故錄之以為傷食者戒
何木叅公子四歲於萬厯壬子季冬朔日始因外感身熱即報點于左大腿上形如
饅首此乃元氣不足不能上升於頭面而下體先見也五朝齊出稠密身熱目閉頂
平脚塌色白少神七朝而目反開張八朝而正面癢破噉惡寒戰咬牙飲食少進大
便泄澇上症雖為甚險然一本於元氣不足故用保元湯加桂附二劑而止而俱復
腫灌堆結狀如桃姿兩目復閉但身肢灰白不行漿而斂大便泄如魚凍謂脾氣虛
寒以前方加木香炮姜二劑繼用人參白朮甘草肉苳蔻附子木香共為末米湯調
下十四朝而胃氣漸開小腿復腫灌成漿背上俱發膿瘡此為餘毒未解且下午身
熱夜半始退為脾陰不足亟宜調脾清解為上故用人參生地芍藥黃連甘草防風
連翹山藥茯苓知母數劑而前症悉平經曰大毒去病十去其八若此危症苟非參
附之劫何能臻此全功姑記此以為治險之驗而因信人事之不可不盡也

痘疹傳心錄卷之十

松江李林馥啟賢氏重校

西吳朱惠明 著

靨後餘症口訣

且如痘成痂死雖云生意已成餘症變遷猶未保全莫喜是故眼合腹脹蹈轍危機
肢體虛浮尚懼凶咎痂或成而反致失聲金為火室腫未消而目先開豁痘成內攻
毒火盛而狂叫喘呼脾胃衰而痂粘不脫餘邪乘胃則利下膿糜熱滲膀胱則便難
溺血經絡各留餘毒往來寒熱無時陰血皆由虧損日晡潮熱延綿肌消食減此名
胃弱何疑能食便溏終患脾遺可慮凸肚擡胸毒乘肺胃張唇弄舌熱蓄心脾肝傷
風熱目怕日而羞明胃中火邪唇口焦而齟爛咳嗽有標有本喘渴有實有虛數次
清溏虛寒客於脾臟若成秘結實熱下注大腸再觀痂落之餘研審癍痕之色桃花
光澤榮衛俱安紫色乾枯尚留餘毒粉白為氣血之虛枯悴實脾家不足偏體赤斑
乃是失于解利渾身乾紫多因客冒風寒本毒未消而癰疽即發餘邪不盡而瘡癤
隨生前後未及百朝風寒猶當重慎大小總期三月飲食何可苟貪
一凡痘俱收靨全賴脾胃強健氣血充足為上若脾胃強氣血足則靨易脫而痂痕
紅活者為順若脾胃虛弱靨不易脫雖脫而痕色枯白紫滯者為險若有餘毒亦宜
詳審故曰靨後當審脾胃氣血虛實而為之損益也

附治驗

一免痘俱收靨後身熱咳嗽聲啞血痰而衄余謂毒火乘金越上竅以黃連解毒湯加門冬犀角丹皮牛旁知母四劑而愈

一痘脫靨未盡余審其內外無邪不可與藥治之治則恐傷其正而變壞只宜避風寒節飲食而已主人從守而愈 一免症亦如前貪天功妄以補藥調理反身熱煩渴偏體發瘡亦有妄補致肺胃邪熱發為癩疹

一免靨後癩疹紫色余謂餘毒熾甚宜清解之以犀角地黃湯加荆防翹旁人中黃及調脾之劑愈亦有不應藥而反加溘世者不治 又一免症亦似前或謂正氣不足補益之即喘脹而死又有失于解利變為膿瘡久久不愈

一免痘痂脫盡正額一痘潰而不斂四九日作痒破出臭膿即聲啞悶亂而死

一免痘痂盡脫頭上一痘不斂廿八朝忽痒甚出蛆一盞許亦聲啞悶亂而死

一免痘後午餘潮熱兩臉赤色譫妄狂煩余謂痘毒已解而氣血兩虛所謂火從虛發之義以保元湯加歸芍黃連治之愈

一痘脫靨後咳血不已余謂餘毒鬱肺以清金降火開鬱解毒之劑愈

一靨後自汗不止痕色淡白余謂陰陽俱虛以十全大補湯調敗蒲散外用溫粉撲法而愈

一痘脫痂後身熱手足自汗不止余謂胃熱以人參白虎湯加黃連治之愈

一兒痘痂脫盡能食便秘身熱口渴余謂胃中有蘊熱也經曰胃熱則消穀治宜利去胃中積熱否則鬱為口疳等候以三黃丸清胃湯愈

一痘痂未脫偏身黃腫腹飽壯熱溺赤余謂脾胃有濕熱素積而兼餘毒不盡也宜消積滲濕解毒以丑補散又米仁連翹牛旁淡竹葉山柃防風白朮茯苓陳皮蒼朮厚朴愈

痕色

夫痘之自生發至成漿結靨乃氣血拘毒生化自然之次序也要知痘後氣血之盈虧必觀疤痕之色可驗矣若疤痕紅潤如桃花色者此氣血之充足也若疤痕凸起紫色作痛者餘毒不解也疤痕凹陷乾枯色白潮熱作痒者正氣虛也經曰虛則補實則瀉中病則止不可逡巡失治以致變異

附治驗

一兒痘痕赤色咸謂餘毒不解以清解之劑不應余原其順期而愈此必乳母有蘊熱也以逍遙散加丹皮山柃木通等子母俱服愈

一兒痘痕白色作痒渴飲便溲余謂脾弱而氣血俱虛以小異攻散加當歸黃芪防風治之愈

一痘疔紫色發斑余謂過於補益以解毒化痘湯治之愈

一痘痕白色肌肉削而溇泄余謂氣血俱虛而脾胃不足若失治日內猶防滯下之

患當大補中氣使痕色紅澤二便清調後無虞矣不從百日內卒

一兒痘痕赤色身熱煩渴余謂餘毒不解以清解之劑而愈

痘癰

痘癰者即痘之餘毒也方其初出無論疎密必以漸而盡其發必以漸而肥漿必以漸而滿收必以期而盡毒已化盡無復他患矣若或出不能盡發不能峻漿不能足及至斂痂如麩薄粘着乾枯則其毒猶未盡若胃氣一弱不能為之保障則必內攻臟腑竟無可生之理必脾胃堅固使毒內無可容之地然後奔走手足曲也委中之處而為癰治以補氣血而兼解毒為主未成膿者內托而解之成膿者決而去之潰爛者益而斂之自無不愈若七日前後見者不可專治結痂後見者不拘何處辨虛實療之若偏身流注清水奔流延綿不已者不治之症也

附治驗

一兒痘五朝兩臂膊腫痛用解散之劑漿不能充毒亦不退反寒戰作痒勢在危急余謂心鑑曰痘之為症前後以十四日之限治者無得急治其標而緩治其本也經曰自人身而言氣血者本也痘疹者標也以痘疹而言痘疹者本也雜症者標也故

治雜症一寸則痘症落後一丈雜症未痊痘已先斃矣內經曰標本不得亡神失國標本已得邪氣乃服治宜補托為主得漿足收疔標本兼治可也乃以保元湯加丁香官桂白朮陳皮治之漿足而痂又以托解之劑其毒成膿而愈

一痘兩足脛痛甚不能伸曲亦不紅腫余謂氣血不足不能榮養於筋骨致使不能伸屈也治以歸芍四君子湯加肉桂牛膝獨活米仁連翹等十數劑而愈

一兒患痘紅綻而稠密漿雖滿而不能蒼老四肢清水痂雖成而少神氣疔如麩薄十二日兩肩臂腫痛咸謂餘毒不盡用養血解毒藥而增倦怠神疲毒不起亦不退余謂陰虛而毒凝滯不化也故曰虛之所在邪必湊之宜大補氣血而兼解毒得氣血調暢則毒遂歸一處得膿成毒化遂用四君子加黃芪陳皮當歸芍藥白芷羌活連翹金銀花重劑補托加減調理成膿愈

一兒患病類前專以解毒之劑致傷脾胃而噉瀉無度四肢厥冷余視謂瀉耗真元用附子理中湯加肉果木香日進二劑肢熱疼痛而腫再以四君子湯加黃芪金銀花白芷調理成膿愈 又一兒症亦如前但以解毒而不固元氣毒不腫痛清水奔

流元氣脫絕而死 又一兒症亦如前醫內解毒而外圍敷腫退攻內腹脹喘急而卒 又一兒患症似前只以圍藥塗敷腫雖退而毒不化凝滯筋骨不能伸屈損一手一足而愈

一免患痘雖稠密而裏實過以補益而生癰腫余曰裏實而補則生癰毒今口渴煩躁二便秘結以三黃丸利之再以清解之劑調理腫消毒散而愈

一或問曰免患痘癰發於兩小腿下歲餘尚潰腐不能解毒口收何也曰蓋膝以下至陰之分經曰足為純陰無陽氣以充托况久膿血淋漓氣寒血弱而所以毒不易化肌肉不長也治宜補脾胃助元氣得陰陽和協毒自運化而解矣以千金托裏散加牛膝檳榔何首烏土茯苓之類漬出嫩骨漸收口而愈或問生多骨者何也曰毒久不散則陰陽交錯凝結成質而為之也與地四生金之義同

一免患痘毒流注四五千兩肩臂痘死如麩薄而少神粘着不脫余謂氣血不足故也以十宣托裏散服之又玉龍膏塗腿兩曲池又鉄箍散圍肩毒留孔成膿以針刺穿以吸筒吸出膿血調理而愈

一免患痘毒出清水胗診微弱面色枯白余謂元氣虛寒以保元湯加桂附白朮治之膿漸濃厚正氣復而愈

疔

夫疔者釘也蓋氣位弱血分不密其毒性不能自散故聚結而成其形也若氣固血盛則毒受制歸附豈有是耶若疔結於四肢不近臟腑雖抵穿筋骨無害也若結於背腹恐穿臟腑慎宜治之斯症必潰出釘根以生肌散敷之長肉膏貼之內服調氣

養血解毒之劑

附治驗

一痘清漿結疔四肢發疔數處能食便調余謂脾胃堅固無虞以內托解毒散治之
潰出疔根以生肌散敷之愈

一痘漿清結疔便溲減食發疔二十餘處皆謂發疔發癰者生余謂此餘毒聚結藉
正氣足潰出釘根而愈今見脾胃氣虛不能當其毒毒反勝正以內托解毒不効其
疔乾陷十四日死

一兒漿足厚屬發疔數處壯熱煩渴能食便秘余謂有餘之毒不盡以四順清涼飲
治之愈

目論見前卷

痘瘡害眼不在于初而在于收靨之後皆由頭面痘密膿水膠固或破爛而復腫灌
毒火鬱蒸內攻于目又或痘出太盛或就遲緩或過服辛熱或失於清解或啖辛辣
或逼受火氣或厚衣衾蓋或客冒風寒或恣食諸卵皆能害目治當活血解毒是為
良法也

附治驗

一兒痘後目胞紅腫不開靨內復灌難收余視謂血熱毒壅不解以當歸生地赤芍

連翹牛旁甘草荆芥防風黃連花粉等治之愈

一痘後目赤腫痛疔痕紫色身熱煩躁余視為毒鬱心肝也蓋毒火盛而刑肺經金衰不能制木木勝則心火炎上肝開竅于目心熱則上衝於目矣以犀角地黃加龍胆草連翹草決明牛旁治之愈

一兜痘後目胞紅腫不開余謂過服辛熱之劑而口舌生瘡咽喉疼痛以黃連解毒湯又犀角地黃湯治之愈

一痘後目患羞明而不紅赤余謂腎水不足血少神勞也以益陰地黃丸治之愈此壯水之主以鎮陽光也

一余每驗數兜患痘後目赤醫以眼藥點之雖愈而毒鬱不散後復赤腫瞳神突陷不治

口齒

蓋痘後口脾開竅于口舌齒心之生瘡或牙齦上齦屬足陽明胃經下齦屬手陽明大腸經潰爛者皆由餘毒不解乘于陽明薰逼上焦而然也宜清胃化毒湯犀角解毒丸主之又人中白散敷之桑根滋抹之若醫之不止唇腫面虛昏睡聲啞飲食不進穿頤潰齒者凶也

附治驗

一兜痘後口中糜爛生瘡余謂膀胱移熱於小腸隔腸不便上為口糜大承氣湯利

之又用柴胡地骨皮煎服愈

一痘後口内生瘡以涼藥不應余謂中氣不足虛火泛上無制用附子理中湯反治冷服而愈

一兒痘後唇口蠕動余謂唇者脾之華口乃脾之竅又陽明之脈環唇口而交人中陽明胃也是以脾胃虛者多有此症以六君子湯補中益氣湯愈

咽喉腫痛

蓋痘後咽喉腫痛者皆由毒留于管窠仍或過用辛溫補劑以致毒火刑金不能清肅而成內鬱積熱相搏而化為火火性上炎而咽喉為出納之門戶故使腫痛耳經曰鬱火可發又曰實火可瀉必先解散而清利之又有脾胃虛衰則元氣不足坎離不濟不能使水升火降故火炎無制得以乘其土位其勢上騰結于會厭故為痺而腫痛也經曰一陰一陽內結謂之喉痺又曰虛火可補宜補益而兼清潤之藥臨病宜審虛實補瀉而治勿溷一途也

附治驗

一兒痘後咽喉腫痛窒塞不通余謂餘毒蓄于心肺致生風痰壅盛邪熱不泄以桐油用鷲銅蘸吐之馳源散服之又甘桔湯加牛蒡連翹射干等治之愈

一兒痘後咽喉腫痛余謂客受風熱蘊積上焦以甘桔湯加牛蒡荊芥升麻防風羌

活治之愈

一兜咽喉腫痛余謂真陰不足相火挾君火之勢上行而然也治宜壯水為主以制陽光不信以寒涼藥治之愈而復腫反覆數次不愈復迎余治原其正治火為寒鬱先以附子理中湯二劑馭其寒又六味地黃丸料加知母麥冬元參又以葛藎散吹之愈

一兜痘後咽喉腫痛余謂脾胃不足陰火上炎以內經從治之法用四君子湯加甘桔牛旁子黃連知母治之愈

一兜痘後咽喉黑陷余謂喉疔以紫葛地蜈蚣等分犀角另磨右前二味或煎汁或搗汁和服而愈

瘡瘍

凡痘後生瘡皆緣痘時失於發解或失於補托過於溫補致毒蘊于陽明賴正氣不虧內不容邪故發于肌表而為膿疥瘡瘍宜辨虛實治之若疔痕紫凸身熱煩渴便秘溺赤者乃餘邪壅盛宜四順清涼飲犀角解毒湯主之若疔痕淡白凹陷瘡潰不欲潮熱便溏者乃脾虛不能收斂宜健脾收斂之劑四君子湯加芍藥米仁防風木香黃芪黃連連翹主之以綿繭散敷之如瘡瘍而二便清調者此餘毒在表宜托裏解毒之劑黃芪甘草當歸芍藥米仁金銀花防風牛旁主之若瘡久而肌肉羸瘦潮

熱煩渴者乃氣血虧損津液枯涸治宜固正氣之劑十全大補湯補中益氣湯主之
又有痘後客胃風寒鬱於肌表而為瘡痍者治宜解散為主又有厚衣溫暖坐卧火
坑過食煎煨發毒等物而為瘡痍者治宜清解為主若四肢瘡盛者四肢屬乎脾胃
乃毒滯於脾也宜三黃丸利之

一兒痘後瘡痍過投清解藥致毒鬱不解或隱或見余謂毒為寒鬱用百解散得汗
而瘡再作又調脾解毒愈

痘毒流注

痘後流注皆由餘毒盛而元氣不足不能逐邪併歸一處而成癰故流散數處漫腫
結塊作痛或微痛治法只留一二成膿其毒得泄餘當以玉龍膏圍退藥宜固元氣
為主用十宣托裏散若毒不赤不腫不痛或成膿不潰者皆元氣虛也宜用人參托
裏散先補而針之庶使毒氣不致內攻氣血不致脫陷若膿出濃厚而痛二便堅閉
者毒未解也先以四順清涼飲又托裏化毒湯若膿出清稀而反痛者氣血虧也用
八珍湯加金銀花膿出而內熱晡熱者陰血虛也用四物加參芪白朮黃連其膿濃
厚乃元氣不脫尚可治若不赤腫而清水奔流者此元氣不足不能成功也宜大補
元氣或有生者用十全大補湯若煩渴壯熱左脈浮而無力乃血燥火熾也宜用六
味地黃丸料加當歸麥冬人參主之凡治痘毒當審陰陽虛實毒之微盛中氣強弱

而治不可概行敗毒以傷胃氣若胃氣有傷多不能成功慎之無忽

痘毒禁敷寒涼藥

癰腫用敷藥當分陰陽虛實而兼用內治之法不可概敷涼藥若紅腫焮痛熱渴脈數而有力痘痕赤色者此毒盛而正氣足乃陽毒也用活命飲又清涼解毒湯若能食便秘用四順清涼飲下之外敷抑陽散則毒自消痰滯自散若堅硬微痛或不痛肉色如故痘痕白色不潰不斂少食便溏者此脾胃氣虛乃陰毒也宜用托裏回陽湯外敷玉龍膏則寒氣自解陽氣自復若其勢欲潰者以鉄箍散圍其焮腫以俟出膿若元氣虛寒不能消散或潰腐而腫不消口不斂者必用溫補庶可保全若陰毒而外敷涼藥則腠理窒塞氣血凝滯毒氣益深良肉反死如內服寒涼敗毒之藥非惟有傷胃氣慮成虛虛之禍蓋曰胃氣得寒不能運行瘀血得寒不能消散死肉得寒不能潰腐新肉得寒不能化生其害可勝道哉

癰腫無頭用刀針法

癰腫已成當分邪之在表在裏可攻可補膿之作與未作膿成者當分膿之淺深高漫已潰者當分膿之濃厚清稀痛之止與不止又當審經絡表裏虛實若焮腫而軟者發于血脈也腫硬而堅者發于肌肉也肉色不變者發於骨也治法毒將成者解散以消其毒已成者托裏以速其膿膿已成者當驗其生熟淺深而必針之以指輕

按便痛者膿淺也重按方痛者膿深也按之不起者膿未成也按之即起者膿已成也若膿未成而即針則泄其氣血而膿反難成若膿已熟而不針則腐潰益深而難收斂若膿深而針淺則內潰不出外血反傷若膿淺而針深則膿雖出而良肉被傷凡針後以紙捻蘸香油納入針口以膏藥貼之庶口不閉再放膿亦可也

千項堂書局出版廣告

症... 心... 卷一



三元大冊價五元

四冊價三元

五元



唐著寫信必讀 六本 二角
商學界尺牘新編 二本 二角

詩法入門 每部二本 定價四角

百首 二本 二角

賦學入門 每冊四角

西話佳話 二冊 二角

宋元明

對類引端 每冊一角

讀史論略 每部二本 一元二角

楹聯彙編 每部八冊 定價三角

快靈堂法帖 每部四本 一元二角
正草千字文 每本二角
正草習字帖 每本三角